



VÖG VOLAPÜKA.

,Daniil Morozov': redakan
ä vicifal,
,shido2308@yahoo.com',
,Ekaterinburg', ,Rossija' / Rusän.

Jäfidot soga bevünetik Volapüka.

YELOD 34^{id}. NÜM: 3. 2024 MÄZUL. PADS: 21 jü 28.

O Volapükaflens valöpo!

Amulo kanob notükön nunädis bukas anik Volapüki tefolas. Fredob ad konstatön, das Volapükakadäm bleibon binön nogan ut, limans kela preparons penädis nulik nitedikün e veütikünis pro reidans, kels olärnons Volapüki fütuero. Leigüpo pük obsik äs mekavapük alik binon fasilikum ka natapüks, sekü kelos nu- lans cedons ön lanäl e vobiäl primana, das dalons lautön tida- buki. Dinäd at suvo kodon pölis difik in buks, ab spelob, das lanäl nulanas no omoikon, e poso opreparons dabükotis nulik ä pumenodölis tidamedömas oksik. Alo pübotts nulik blöfons, das pük obsik pagebon, e stigädrons votikanis ad lärnön oni.

Binos nitedik, das buk in vol obsik resodatopedas lölo pa- nosüköläs jinon binön med gudikün ad kipedön nüni. Atos tefon i bukis leäktronik pö bukems e selidöps bevüresodiks pu- bölis. Balido mögods binons vemikums, das bukems somik olaiblebons dagetoviks (pu medü toped: „Ragiv bevüresoda”). Telido „digitapiratans” ai kopiedons e spearükons valöpo kon- letis bukemas somik. Kilido ans (samo el Ridero Rusänik) se- drons samädi leäktronik buka alik okik tatabukeme cifik läna okik. Vobots timakompenanas obsik ba no oglömädikons ed oyufons votikanis ad studön staböfikumo Volapüki.

Valanes gudikünosi vipöl redakan:

Daniil
Morozov


LITERAT NULIK.

① FOVALISEDS FA „ARIE DE JONG’ SA VÖDS SE „VOLAPÜKAGASED PRO NEDÄNAPÜKANS” E VÖDEMS CALÖFIK VOTIK.

Redakan: „Hermann Philipp’s‘ („Bad Godesberg, Bonn‘, 2024 febul).
 Pübot rigik: <https://www.facebook.com/groups/volapukalised/permalink/10160594733895129/>.
 Utanes, pro kels el Facebook peproibon: https://vk.com/volapuk_sprache?w=wall-69180623_826%2Fall.

Sotül nulik ut vödaliseda, kel ninädon vödis zao 25'200 plödü vöda-buk gretik fa hiel Arie de Jong. Lebuk at binon sek vestiga laidulöl vöde-mas dasamik. I ninädon nulavödis fa kadäm pezepölis e fa lautans nuti-mik pedatikölis. Redakan so ebepenom diseini nuik oka: „In sotüls fütürük vödaliseda at osteifob ad menodön döfis e ad läükön vödedis, kels büö päneküpons.“

② BINOB-LI SMALIK? (Cilabuk telpükik labü pads 40.)



Lautan vödema: „Philipp Winterberg‘, magodan: „Nadja Wichmann‘, tradutan ini Volapük: „Andy Drummond‘ (toped lönik oma: <https://www.andydrummond.net/>).

Dabükot Deutänapükik: <https://www.amazon.com/klein-Binob-li-smalik-Zweisprachiges-Deutsch-Volap%C3%BCk-ebook/dp/B0BPMKR679/>.

Dabükot Linglänapükik: <https://www.amazon.com/small-Binob-li-smalik-English-Volap%C3%BCk-Winterberg-ebook/dp/B0BK9KKBRN>.

Magodabuk pro cils, sotüls kela dabinons in püks e dialegs mödiks, penotükön Volapüko tü 2023, yanul, 5. „Binob-li smalik?“ jiel Tamia ne-fümälof e bleibof säkön nimes difik, kelis kolkömof pö tev okik. Fino dagetof gespiki bluvüköl...

③ VOLAPÜK FIKULIK AT. (Penots brefik Rusänapükik dö Volapükav.)

Tiäd rigädik: „Ehtot slozhnyj volapjuk. Ocherki po volapjukologii“. Lautan: „Daniil Morozov‘. Dabüköt: „Izdatel’skije reshenija“.

Kot: ,ISBN': 978-5-0062-2924-2. Pads 180 in sotül büükik.

Pad bevüresodik ko pübot: https://ridero.ru/books/etot_slozhnyi_volapyuk/.

Pad pö bukem bevüresodik: ,Litres': <https://www.litres.ru/book/daniil-morozov-32929570/etot-slozhnyy-volapuk-ocherki-po-volapukologii-70327654/>.

Ninädon gramati brefik Volapükka pro Rusänapükans, penotis dö säkäds difik Volapükava, dokümis dö jenotem Volapükamufa in Rusän üntumyel degzülid. Ponun buka so tononöv Volapükö: „Tiäd sökoda yege dilas: „Volapük fikulik at” primo pedatikon as med taspika ta lesags sekü zeils propagidik esüköls in bepenots brefik e tidabuks pro primans tefü fasil levemik Volapükka. Tiäd at soelöfiko pereidöl binon tatikälük, bi püks pageböl nestipiko fikuliks nonons, ai nedos kuratükön, pro kin e tefü kis fikulons. Samo pro utans, kels no kösömons ad gebädön lartigis (fümiki e nefümiki), Volapük tefü atos no jinonöv binön fasilik, leigoäsä binonöv fasilik ma fonet pro utans, pö kels ad distidön vokatis: „e” e „ä” < no binos fikulikum kas natemön. Ye — äsä penets ömik buka at jo noms — bos pö mödikünans lärnanas Volapükka fikulon, efe ad dasevön oni püki livätik labü noms e patöfs löniks flagöls bejäfi küpälük, no finidi. Suvo — desino u nenviliko — Volapükans steifülon gönü fasilikam geba plagik püka ad lönedükön oni bai kösömons spikik oksik, sümükölo ko Lingläna, Fransäna, Rusänapüks, sperant, ... Atos dilo paplänos dub jenotem mäpetik Volapükka; valans sevons, das esufon feafomamis plubali, e jinos, das tim pötöfik ekömon-la ad ut nulik. Jenöfo Volapük, kel äsva älabon-la büö cilüpi neküpidik, yunuüpi volutiälik, kü äreafon de lemuam bal ini ut votik, ereafon ad stad maxumiko mögiko leigavetik pro ok. Ad blebükön oni somiki binos siämäröletik tefü el „ad fölon konsälis büanas gretik obsik”: ,Schleyer’, ,Schnepper’, ,Kerckhoffs’, ,Rosenberger’, ,Sprague’, ,de Jong’, kelans älevüdoms ad vitön traduti vödik, steifön ad no gebön fomis notoda tikodas balido süükölis in tikäl, ab ad sukön mu suemovikis pro fuginänapükans, efe neudikis. Klien at ad fömön stüli bevünetik jünu vedükön Volapükki küpädiki leigodu mekavapüks mödikün ed ädistükön oni de pükadisins valik suniko pos on äda vedöls (sis pub speranta). Atos labükön Volapükki me lönöf e vedükön oni demü pats ömik fikuliki pro alan, ab seko suemoviki pro valans nesekidiko de lomapük, sevabo bali pükas neudikün in grup volapükas.”

(4) EL, MODERNES VOLAPÜK' (tidabuk Deutänapükik).

Tiäd: „Modernes Volapük'. El PDF labü pads 166 + 3. Lautan: „Juha Stump'. Pepüböl tü 2024 febul 9. Ladet leáktronik pübota:
[,https://www.yumpu.com/de/Modernes_Volapük'](https://www.yumpu.com/de/Modernes_Volapük').

Püböt at labon dilis tel. Dil balid ninädon bepenami gramata Volapükka bai tidabuk legudik fa „Johann Schmidt' pro Deutänapükans. Dil telid ä smalikum ninädon mobis lautana tefü votükam Volapükka pö geb mudöfik. El Hermann Philippss: cifal < epenom bevüresodo lautane sökölosi:

„Vemo eplidob fonuni lunik ola. Jenöfiko ya eropob studi demü pöks e pöls mödik, posä ireidob padis 30.“ Poso emäniotom dinis anik, kelis lautan bo ekoräkon in sotül nulik buka ot. I cifal epenom:

„Valemiko vilob mäniötön, das in tidabuk dö Volapük pro primans no sötoy mäniötön fomis de sotüls yönädk Volapükka tumyela 19^{id}. Atos te kofudükön lärnölanis.

Zuo cedob, das pas sötoy sevön vemo gudiko püki, büä lautoy tida buki dö pük at. Ba okanol koräkön buki olik, posä ulärnol gudikumo Volapükki. Vilöfo oyufobs oli.“

Bevä mobs difik lautan klienon ad nulädükön tatanemis bai bolita stad nutimik. Flanaü redak dalob niludön, das ifi kadäm ozeponöv meno di at stüla mudöfik, dil gretikün menefa no oprimonöv fredo ad spikön me Volapük, kludo votükams somik no binons zesüdiks. Mobs votik ad fasilikön spiki Volapükik pro gebans (mal plunuma i papladon fo deklinal mal [*domsa, domas]; subyet ä pönop pösodik no pamoädon in set alik; läöds papladons fo subsats ut, kelis fümetons, e no padeklinons; subsats anik labons vokati primik ma fom valöpo sevädk) i no jinons binön frutiks. Binos nitedik, das sümons ad gebäd Volapükka dü period primik.

CEDS E TIKODS.

In Rusän ünü yels deg val votikon, ünü yels teltum nos votikon.

Hiel *Pjotr Stolypin* (balidal Rusäna de yel: 1906 jü 1911).

Mödikans klienons ad cänidön suemodis tel: els „lomän“ ed „or, o klatall!“

Hiel *Saltykov-Shchedrin* (calan e lautan Rusänik, 1826—1889).

SLUDS KADÄMA.

1. Kadäm ezepon nemi taledavik, kel nog ädefon in Volapük:

Tarkop = ‚Antarctica‘.

Dub atos lised nemas Volapükik kontinäas ün timäd nuik vedon fulanumik:

Siyop, Frikop, Nolüda=Merop, Sulüda=Merop, Tarkop, Yurop e Stralop.

2. I kadäm elonöfukon subsati: **lekontinän** (Lingl.: ‚super-continent‘, Deut.: ‚Großkontinent, Superkontinent [in früheren oder künftigen Erdzeitaltern]‘).

3. Nems lekontinäas vönik no neodons nemis lönik Volapükik. Plao geboyös lartigis „el“ ud „elän“ sa foginavödis: els (eläns) Gondwana, Pangää, Laurentia, e ret.

4. Kadäm ezepon as pläots vödis: **Laurasiyop e Ru=Laurasiyop**, bi vöds at sevädons bevü Volapükans dub yeged tefik in vükiped.

Ma pened de ‚Hermann Philipp‘: cifal.



Sleatod in sil.

Fa ,Frank Roger', tiäd rigik: ,The Crack in the Sky',
ini Volapük petradutöl fa ,Hermann Philipps'.

Jiel Charlotte äropof spati oka ve jol, bi ävipof ad drinön bovületi kafa. Ätuvoft seadöpi su tärat solöfik ed äbonedof bovüli labü ,cappuccino'. Täno ägetenükof oki, ed äjuitof solasvieti e melavienili.

Süpo äküpof bosi bisarik, ebo ven bötan äblinom drinedi ofa.

„Danö!” äsagof. „Reto, sevol-li, kis binon atos? Logotos semo äs sleatod in sil, äsva emairekon-la. Ninälo säkob obe, kisi atos sinifon-la. Spelob, das binon nosfefik.” Äjonof löpio pubodi, keli iküpof. Dido älogoton soäsä ikonof oni.

Bötan äjedom logedi brefüpik silio ed äsagom: „Jenöfiko logotos äs sleatod, ab no kudolös! Val ponomükön.”

Älülogof brefüpiko omi, täno äsagof: „Kisi vilol-li notodön me utos, das val ponomükön?”

„Sunädo otelefonob,” äsagom nenkudiko. „Kvip ela SkyFix onätükön vifikasi atosi.”

Bötan ägegolom ini dom. Älipof kafi oka ed älogedof lü sleatod. To vöds takedüköl bötnana bos mifätilik ästüikon de on. Neföro ilogof somikosi büö, ab alo no älecedof oni bümali gudik.

Mans tel äkommoms se dom stedöfo lü tabil ofa. Piklotoms tu gudiko ad binön törans – ba äbinoms sefaganetans u poldans in sifanaklots. Kisi äsinifon-li atos. Kis nu öjenon-li?

Balan manas äsagom: „Begö! okanol-li kekömön ko obs? Odulos mö minuts te nemödiks.”

„Atos kisi tefon-li?” äsäkof boso netakediko.

Man äjonom äl sleatod. „Tefon utosi, keli eküpol ebo nu. Klülos, das at ebluvükön oli, e sötol getön ole pläni. Sökolös obis, begö! No kudolös!”

Älöädof ed äsökof ninio manis tel at. Ädugoms ofi lü tab in spadädpöö, kö nek äkanonöv lilön onis, ed äbüdoms, das öseidofös oki.

„Kims binols?” äsäkof.

Balan manas ädeimom säki: „Neveütikö! Binobs is ad tuvedön säkädi.”

„Elogol bosi bluvüköl,” man telid äsagom.

Äsiof kapo. „Elogob sleatodi in sil. Dido ejekon obi. Kis binon-li atos?”

„Säkäd kaenik,” man ägespikom. „Ba sek käla nesaïdik. Ün tim läistik säkäds vemik tefü finen ädabinons. Seko somikos kanon komädön, do no söton jenön. E fümo nek dalon küpön atosi.”

„No suemobs, das ekanol logön sleatodi,” man balid äsagom. „Somikos löliko binon nedälovik. Atos ye no plu nu veüton. Bejäfobs säkädi.”

„Bötan ämäniotom eli ‚SkyFix’ u somikosi. Mögos-li?”

„Fümö!” äsiom kapo. „Nätükam no odulon lunüpo.”

„Begobs säkusadi demü neplit, kel ereifon oli,” man telid äsagom. „Gevobs ole fümi, das atos no plu ojenon. E nog bosi ...”

Vög oma äjinon binön boso tädik. Demü atos ibinof dredilik.

„Si!” äsagof, dremäli ätaetölo.

„Demädü valiks palets peteföl spikolöd dö atos ko nek. Atos oblibonöd te bevü obs! Kanobs-li spetön seilöfi lölilik ola?” Älüodükom logedi koldälik, düfälük äl of. Äklülos, das ämutof lobedön. Äbuükof ad no väältöön sekis, if no öfölofov rajani at.

Äsiof kapo. „Baicedö! Nek ga okredonöv, das elegob sleatodi in sil.”

„Süperö! Zuo nog labol-li säkis seimik?”

Änoof kapo. Älöädons, ed ägegolons sui tärat, kö äpladof oki len tab, kö iseadof brefobüo. Mans tel et äleditoms ed ämogoloms. Älogedof löpio ed älogof, das sil äbinon leigöfiko blövik, löliko nen lefogs. E nen sleatods. Klülabiko säkäd pituvedon. Ma geilot sola äjinos, das is tim mödikum ipasetikon, kas ilifädons nino. Bisarikö!

Äprimof ad säkön oki it, va pubod et jenöfiko ijenon-la. Ämögos-li, das ibinos-la halud? U liud-li logamik? Äbinof-li balikan, kel ilogen sleatodi? Mens votik su spataveg ve jol ed in kafibötöps ba leigo pivisitons-li fa mans me pläns e nuned? Äzilogof zü ok, ab nek äkondötön miniludiko.

Bötan äblinom ofe bovüli nog bali labü ,cappuccino’.

„At binon glatik,” äsagom ko smilil vemik. „Bo meritol oni pos utos, keli ebelifol.”

Äjonof äl sil, kö sleatod ibinon.

„Jinos, das säkäd petuvedon,” äsagof visipölo.

Bötan no ägeädom. Älogedom, äsva no äsuemom utosi, keli isagof.

„Gudö!” äsagof, ed älipof eli cappuccino. Klüliko, no äsötof mäniötön „pubodi” lo seiman, ab atos leigo ätefon-li bötni, kel ga äsevom dinädi lölilik at? Ba binos gudikum ad kondötön, äsva valikos äbinon ön stad gudik, pekontrolöl. Too äklülikos pö of, das ömna övestigof, va sleatods nonik äbinons in sil.

Neföro ga kanoy labön fümi tefü säkäds finenik. ■



DOG ELAS ,BASKERVILLES'.

KAPIT VELID. ELS ,STAPLETONS' DI ,MERRIPIT HOUSE' (3).

„Obs valik vemo äludredobs, das pos deadam lügik siöra: ‚Charles’ < hibaonül nulik mogädiko ürefudom ad lödön is. Binos tuvemik ad flagön de man benolabik ad ditön de zif e fimalödikön pö top somik, ab no nedob sagön ole, das atos vemo veüton pro lödans länäda. Siör: ‚Henry’ < labom, äsä niludob, dredälis lukredik nonik tefü mijenot?”

„Cedob atosi.”

„Fümo sevol-li konädi tefü dog milananik, kel dayagon famüli?”

„Elelilob atosi.”

„Binos bisarik, kio=kredällico feilans trätions atosi! Ali=kan onas blümon ad yulön, das älogen jafäbi sümik pö maräd.” Äspikom atosi smilülo, ab äküpob pö logs omik, das äjinom dacedön yegädifefikumi. „Magäl siöra: ‚Charles’ < vemo peglepädon fa jenotem, e no dotob, das eseikon ome deadami lügik.”

„Ab lio-li?”

„Nevasit omik päfakädükön sovemo, das komikam doga seimik äfagon ad blinädön vobedi deidöl lade malädik omik. Fomälob, das fe älogom bosi sümik ün neit et pö lael taxudik. Ädredob, das mifät seimik ökanon jenön, bi vemo älöfob bälädädani ed äsevob, das lad omik äbinon ifibiköl.”

„Se kis äsevol-li atosi?”

„Flen obik: ‚Mortimer’ < ikonom obe.”

„Cedol-li täno, das dog seimik äpöjuton siöri: ‚Charles’, e das seko ideadom sekü lejek?”

„Labol-li pläni seimik pötöfikum?”

„Ereafob ad slud nonik.”

„Söl: ‚Sherlock Holmes’ ereafom-li üfo ad seimos?”

Vöds at äkoedons töbidön obi ad natemön dü timül, ab loged lü logod takedälik e nüloget kipälik tävakompenana obik äblöfons, das süpäd nonik pidesinon.

Konot pofövon.